

**Saturday, April 11, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**'EK BHARAT SHRESHTHA BHARAT'**

'Ek Bharat Shreshtha Bharat' hmalakna hnuaiah Larsap, General (Rtd) Vijay Kumar Singh, hovin Bihar, Rajasthan, Odisha leh Himachal Pradesh-te state dinchamphaphak lawmna Lok Bhavan Durbar Hall ah nimin khan hman a ni.

Larsap VK Singh chuan state danglam bik leh pawimawh tak pali Bihar, Rajasthan, Odisha leh Himachal Pradesh-te dinchamphaphak lawmna buatsaih a ni chu lawmawm a tih thu sawiin hemi pual hian duhsakna a hlan a. State tinte chuan danglam bikna leh thatna riau bakah theihna nasa tak an neih avangin hmasawmna nasa tak an state ah a thleng a ti a. Ek Bharat Shreshtha Bharat hmalakna chu fakawm a tih thu sawiin, State leh UT-te dinchamphaphak inlawm sak tawn thin hmangin midangte hnam ziarang, nunphung leh tih dante an hriat thuk leh zual phah a, hei hian inpumkhatna siamin India chu ram danglam bik a nih zia a lantir a ti a. Danglamna nasa tak kara an inpumkhat tlatna chu kum 2047-a ram changkang leh intodelh, "Viksit Bharat" a India siam tura hmanraw pawimawh tak a nih thu a sawi a. Programme hlawhtlin theih nana tha thawhtu zawng zawngte chhuanawm a tih thu a sawi bawk.

Ek Bharat Shreshtha Bharat programme hian India rama State leh UT hrang hranga cheng hnam hrang hrang, hnam ziarang leh nunphung inang lo tak takte inkarah inpawhna leh inunauna tha zawk hnam ziarang inhriatpawh tawmna kaltlangin siam a tum a ni.



**OIL PALM**

Lunglei District Agriculture Office, Lungsen Block Agricultural Technology Management Agency (ATMA) leh Patanjali Company buatsaihin Tlabungah RKVY hnuaia lei hriselna chungchang zir hona, "Awareness on Soil Health and Fertilty" leh oil palm ching mek leh ching thar turte tan training buatsaih a ni a. PM Kisan saturation drive buatsaih a ni bawk.

Lunglei District Agriculture Officer Dr Samuel Lalliansanga hovin Agriculture & Farmers Welfare Department hnuaia thawktute leh Patanjali Company ai awhte chuan hun an hmanpui a. ATMA Lunglei District Deputy Project Director Pu John Laltluangliana chuan endik tura soil sample lak dan te, lei hrisel dan leh lei that dan chungchanga hriat tur pawimawh hrang hrang a zirtir a. Patanjali Company Mizoram State Head Pu Timothy Laldailova chuan oil palm chin dan a zirtir bawk.

He hunah hian Tlabung Block huam chhunga kut hna thawktu mi 60 an tel a. Tlabung Block-a oil palm-a hma lakna report ngaihthlak niin, hma lak zui zel dan turte sawi ho a ni bawk.

Lunglei DAO Dr Samuel Laliangsanga chuan Tlabung Block chhunga buh hmun leilet pawimawhte a tlawh nghal a. Mizoram hmun danga chin ve loh thlasik buh chinna hmunte tlawhin, hma lak zel dan tur en ho a ni a. Tlabungah vek hian Jute Corporation of India leh Tlabung MPACS te nen thawk hova jute ching tura hma lak dan tur leh ruahmanna kalpui dan tur te sawi ho a ni bawk.



## **THENZAWL PEACE CITY**

Nimin khan Thenzawl Peace City atana Dilpui chhehvela ram ruahman dan ngaihtuahin Serchhip District Level Government Land Authority an thukhawm.

District Bawrhsap Pu Paul L. Khuma hova thutkhawmah hian Thenzawl Peace City (Greenfield Project) hmalakna kal zela sorkar ram hman dan tur leh District chhunga hmasawna hna hrang hrang thawh dante sawi ho a ni a.

Thenzawl Peace City hmalakna hnuaiah hian Dilpui area-a AH&Vety Department ram acre 140-a zau, ran chaw chinna hmun leh hnathawktute hmunhma te chu, UD&PA Department-in hmasawna hna an thawhna tur atana hman tura ruahman a nih dan chungchangte sawi ho a ni. He hmun hi Neihloh khua-a sawn tura rel tawh a nih laiin, AH&Vety Department hotute chuan Neihloh hi khawl hmanga huan leh rante enkawlna kalpui na atan chuan hmun remchang nia an hriat loh thu sawiin, thuneitu sang zawkte nen ngaihtuah that leh tura rel a ni.

Bawrhsap Pu Paul L. Khuma chuan sorkar ramte chu ram leh mipui tana vek a nih avangin uluk tak chak zawka humhalhna kalpui tur a nih thu a sawi a. Ram ri hung leh chhinchhiahna felfai tak neih a tul thu te, sorkar leh vantlang ram nek thinte lakah chak zawka hma lak a nih tur thu sawiin hun hi a khar a ni.

